

04 SEP 1998

Anwar-Pas/Aliran

PAS DUKACITA DENGAN PEMECATAN ANWAR

ALOR SETAR, 4 Sept (Bernama) -- Pas hari ini menyatakan dukacita dengan pemecatan Datuk Seri Anwar Ibrahim daripada kerajaan dan Umno serta meminta supaya Anwar diberi peluang yang adil untuk membela diri.

"Saya dukacita dengan pemecatan Anwar daripada apa jua jawatan," kata Presiden Pas Datuk Fadzil Noor.

"Saya berharap Perdana Menteri Datuk Seri Dr Mahathir Mohamad memberi peluang yang adil untuk Anwar membuat penjelasan dan membela diri berhubung afidavit yang memburukkan nama beliau," katanya.

Beliau berkata hak dan kebebasan yang adil harus diberikan kepada Anwar terhadap semua tuduhan itu supaya rakyat tidak dikelirukan terutama pada saat negara dilanda kegawatan ekonomi.

Sementara itu, pergerakan reformasi sosial Aliran dalam kenyataannya berkata tuduhan terhadap Anwar masih merupakan tuduhan sahaja sehinggalah disahkan kebenarannya.

"Walau apa pun jenayah yang menjadi tuduhan itu, Anwar hendaklah didakwa di mahkamah terbuka untuk memastikan sama ada ia benar atau sebaliknya. Beliau seharusnya diberi segala peluang untuk membela dirinya dan membersihkan namanya," kata Presidennya P. Ramakrishnan.

-- BERNAMA

MZM SJ NMO